

INUIT ATAQATIGIIT

Inatsisartuni



9.oktober 2020

Inatsisartut Suleriaasianni § 37, imm. 1 naapertorlugu apeqquitiit tulliuuttut Naalakkersuisunut saqqummiuppakka:

Naalakkersuisunut apeqquitiit:

- 1. Naalakkersuisut qaqugu Qeqertarsuup tunuani ilaasunik angallassinermut sullissinissamut isumaqatigiissutissaq, ulloq 1. januar 2021 atuutilersussa qaqummiutissallugu naatsorsuutigaat?**
- 2. Naalakkersuisut Takornariartitsinermut immikkoortumut pilersaarutaat 2016-2020 "Takornariartitsinermik Kalaallit Nunaanni ineriartortitsineq – Suut iliuusaasariaqarpat" naapertorlugu "Angallannermut tunngasumik kiffartuussinermut isumaqatigiissutit angallaffinnut imminnut akilersinnaanngitsunut tunngasut taamaattumik piffissaagallartillugu siusissukkut isumaqatigiissutigineqartassapput" – qanoq kingusitsigisukkut nutaanik isumaqatigiissusiortoqarsinnaava, sulilu tamanna "piffissaagallartutut" isigalugu?**
- 3. Sullissinissamut isumaqatigiissutit angallattunut tamanut, taakku sumi najugaqartuunerat apeqquataatinnagu, assigiimmik tunngavissaqartitsissappat – taamaalilluni taakku piffinni takornariartitsinermik ikorfartuisinnaaqullugit?**
- 4. Sullissinissamik isumaqatigiissutit atortuutunik nutarterinissamut qularnaarisuussappat, taamaaliornikkut ukiuni kingullerni kinguaattooqattaarnerit annikillisinneqarsinnaaqullugit?**
- 5. Sullissinissamut isumaqatigiissutit maanna atuuttut atorunnaarfissaat ukiuni sisamani ilisimaneqareerpoq – isumaqatiginninniarnit suli naammassineqannginnerannut suna patsisaava?**
- 6. Naalakkersuisut takornariartitseqatigiinnut kaaviiartitanik annaasaqartunik taarsiissuteqarnissamik neqerooruteqalersaarpat, taakku ilaasunik angallassisinnaannginneq pissutigalugu 2021-mi ukiuunerani neqeroorutiminnik tuniniaasinnaannginnerat pissutigalugu?**
- 7. Ilaasunik angallassineq pitsaanerulersinniarlugu, ulluni 20. aamma 21. marts 2019-mi attaveqatigiinnermut isumasioqatiginnermi kaammattuutit sorliit Qeqertarsuup tunuani sullissinissamik isumaqatigiissutinut Naalakkersuisut ilanngutilersaarpat?**

(Inatsisartunut ilaasortaq Aqqa Samuelsen, Inuit Ataqatigiit)

Tunngavilersuut:

Qeqertarsuup tunuani ilaasunik angallassinermut sullissinissamut isumaqatigiisummik nutaamik suli tamanut saqqummiussisoqannginnera, Qeqertarsuup tunuani takornariartitseqatigiiffiit annertuumik pakatsissutigaat, naak isumaqatigiissut maanna atuuttoq qaammatit pingasut qaangiuppata atorunnaartussaagaluartoq. Taamaattoqarnerata takornariartitseqatigiiffiit suliffeqarfiutimik siunissamut pilersaarusiorsinnaanera ajornarsivitsippaa. Takornarianik qimussiussisarnerit qaammatialuit qaangiuppata aallartissapput, pisisartullu amerlasuut taamatut angalaarnissaq qaammatinit arfinilinnit sivilunerusumik siumoortumik pilersaarusiortarpaat. Taamattaq angalatitseqatigiiffiit tuniniaasartullu takornariartitseqatigiiffiit Qeqertarsuup tunuani tuniagaat tulerusuttupilussuuat, sullissinissamilli isumaqatigiissuteqartoqannginnera pissutigalugu angalanissat tuniniarlugit aallartinneqarsinnaanngillat. Naalakkersuisut 2016-2020 takornariartitsinermut periusissiaminni qupperneq 32-mi piffissaalluartillugu isumaqatigiissutit nutaat suliarineqarnissaasa qanoq pingaartigineranik namminneerlutik nassuiaanerat tunngavigalugu, piffissamik kinguaattoortoqarnera suli tupinnarnerulersutut isigaara.

Ukioq takornariartitseqatigiiffiit corona pissutigalugu suliffeqarfiutimik kaaviiartitaasa annertunersaannik annasaqarfisaaat maanna qaangiukkiartortoq pissutigalugu, siumut qiviarnissamut periarfissaqarnissaq immikkut pingaaruteqarpoq. Naalakkersuisullu takornariartitseqatigiiffinnut pitsaasunik sinaakkusiinissamik pingaartitsinnginnerat suli pissutsinik pakatsinarnerulersitsivoq.

Sullissinissamik isumaqatigiissuteqannginneq takornariartitseqatigiiffiit matusariaqalerneranik imaluunniit illoqarfimmut suluusalinnut mittarfilimmut nuussinnaaneranik kingunearluarsinnaavoq – tamannalu uggornartupilussuussaaq, matumanimi Qeqertarsuup tunuani illoqarfinni nunaqarfinnilu ineriartortitsinermik pilersitsinissaq aamma pineqarpoq.

Apeqqutit ullut qulit iluanni akineqarnissaat qinnutigaara.